

小司馬奏草

小司馬草卷之三

職方稿

題爲邊工將竣預嚴責成以圖永久事案呈到部
看得大同巡撫鄭 題稱大同原議脩築邊工今
歲可完但築以塞土非比磚石不惟歲久易淪卽
使霖雨難支乞要責成大同各路叅守等官將脩
過牆臺不時巡視遇有披塌卽時脩補各官陞遷
事故須行交代具呈督撫方許離任先後任事官
員不得因循推諉每季終該道巡視呈報督撫仍
聽從實查叅春秋兩防聽撫鎮官巡閱歲終疏題

巡按復命併行查勘一體奏聞并乞著爲定例一
節爲照各邊脩守所重臺牆大同邊工尤爲緊要
今該鎮原議應脩牆臺當事諸臣遵奉

欽依率作興事今歲可完撫臣又恐歲久易湮雨澤
易塌欲嚴加責成以圖善後相應依擬合候

命下移咨大同督撫衙門轉行各該叅守等官查照
題議事理將前項脩過牆臺各照所分界限加意
經營共圖保障未完者作速脩砌務使堅固已完
者時常巡視補葺傾圯其無益空心墩臺卽行停

止各官如有陞遷事故卽以所管臺墻竝無損壞
交代明白具結呈報督撫衙門方許離任若有因
循怠玩以致傾損者罪在前任則坐前任罪在接
管則坐接管各督撫官查明分數指名叅奏議行
降罰至於該道巡視撫鎮親閱等項悉如所議著
爲定例仍通行各鎮知會施行等因萬曆六年二
月初八日具題奉

聖旨是欽此

題爲春和土解脩築繁興懇乞

聖明稍罷不急之工以甦極苦邊軍事職方清吏司
案呈到部看得兵科給事中王 題謂虜款七年
各邊鎮建築頻興軍士苦於催迫監事急於報完
行糧鹽菜又多尅減以致創成者徒爲塞責傾圯
者復爲重脩工無了期逃亡枕籍縱成險隘無人
固守關隴雲朔之間脫有意外將何禦侮乞要申
飭各鎮凡邊牆敵臺係衝要孤懸者照舊脩理其
餘不急之工盡行停止脩工軍士止用步軍佐以

餘丁及馬兵老弱者不妨寬限務在堅固以免重
費各軍士應得月糧鹽菜銀兩俱要依時給散有
馬壯軍止令操練各一節爲照封疆之事保障爲
先八事之陳脩築爲首邇因北虜欵貢建議脩築
東自撫順西抵加峪脩整臺牆壕塹一以防零寇
之往來一以阻大舉之直達脩其所可守以守其
所必攻其意誠善策亦可行但設險之事有三城
堡爲最牆垣次之墩臺又次之收斂人畜堅壁清
野惟城堡是資所當亟脩者也阻遏虜騎緩其衝

突亦有藉於邊墻所當次脩者也至於墩臺以備
瞭望以傳砲火爲我軍之耳目或十里或五里乃
置一座或七人或五人共守一墩惟於邊口險要
及賊衆出入之處從宜設立古所不廢也至若空
心磚臺徒備美觀無益實用且一臺之脩幾三百
金而邊方無木無石之處採辦尤難此則不必脩
築者也况九邊之地里遠近險易既有不同而軍
力多寡不一若不量人情不因土俗必欲一槩添
築此又事之不可爲者也但人心喜好不同競相

馳騫城堡脩矣從而添之邊牆脩矣從而加之墩
臺脩矣從而益之土可也磚可也而必欲一例磚
石前工未已後工復興前議未詳後議復起春夏
則脩築秋冬則採辦邊無餘人人無餘力是以
朝廷保障之意番爲邊人怨咨之媒科臣所以反覆
剴切直言不諱端以此也相應依擬通行申飭恭
候

命下備行九邊總督鎮巡諸臣查照所議轉行各該
司道將領等官各展忠心務脩實事備查見今工

程惟將城堡先行脩築務要高堅可以收歛其邊
牆未完者依限催完已完者時加脩葺務在堅固
可阻虜騎墩臺惟取足以備瞭望傳烽火或磚或
土各從其便十里五里各從其宜其余空心石臺
半里一里無益戰守者悉行停止不得因習舊套
固執已見圖務虛名無裨實用至於軍夫惟將步
軍及班軍協力分番赴工寬其期限恤其饑寒合
用鹽菜口糧工價俱宜優厚使人心樂從勤于趨
事其有馬官軍尤當加意撫恤時勤訓練不得一

槩役使致士馬困疲行伍消耗若司道官有不仰
體

德意好事喜功各將領有託名脩築濫役軍士科歛
剝削者聽督撫巡按及臣等指實叅論再照流俗
之見因勢低昂中人之情隨時高下先年脩築之
議興則競議興作不復深慮遂致作無益以害有
益今一聞前議必又習爲安靜不復經營或致當
爲而亦不爲此皆踈於謀

國不盡由衷爲今之計在爲其所當爲止其所當止

急其所當急緩其所當緩則戰守有資封疆可賴
斯下不戾於科臣之言上無負於

陛下責成之意此又深望於當事諸臣者也伏乞
聖裁等因萬曆六年二月初八日具題奉

聖旨設險守隘乃邊防要務况當虜款閑暇之時正
宜綢繆牖戶以備不虞但近年以來邊臣多不實心
任事年年脩築旋復傾壞以致工無了期徒苦疲軍
無裨戰守今後都着酌量緩急有必不可已的着督
撫官悉心措畫身親閱視多方鼓舞使人忘勞務求

保障實用其餘不緊要的依擬停止不許因而罷廢
脩守遂弛邊備致貽後患欽此

題爲春和土解脩築繁興懇乞

聖明稍罷不急之工以甦極苦邊軍事職方清吏司
案呈到部看得兵科給事中王 題前各一節爲
照王公設險重門待暴三代脩文德城朔不聞已
也兩漢盛征伐乘障不聞已也邇因北虜款貢建
議脩築東自撫順西抵嘉峪脩整臺牆濠塹一以
防零寇之往來一以阻大舉之直達脩其所可守
以守其所必致固非謂專於脩守遂爾忘戰也但
城郭溝渠原非天造版築興作未免勞人今諸鎮

脩工軍壯人等乘時閒暇驅之力役免其操練責
之赴工且設險脩防衛其室家保其軀命月糧工
食之外加有行糧鹽菜佚道使民無踰於此若使
當事諸臣虛心經畧酌地方之衝緩定工程之後
先憫軍士之勞苦嚴將領之剋減則悅以使民何
勞何怨乃今羣言籍籍咸謂剋剥多端奸弊非一
以致軍士之疲苦不堪將領之督責更甚誠有如
科臣所言者所擬議欲軍伍邊防無脩並舉滌千
戰守有裨擬合通行申飭恭候

命下備行各鎮督撫諸臣查照所議轉行各該鎮道將領等官備查見今脩築工程先若城堡次若邊牆次若墩臺次若壕塹又次若山崖敵臺果係衝要孤懸及圯壞傾頽者趲此春融及時興作責令各該監督將吏查照近議時督步兵民壯及餘丁幫助脩築要各灰石堅固脩砌如式月糧工食不得扣除行糧鹽菜從實給散其有限期太逼者少假從寬鹽糧不準者稍加優厚無復過爲裁減巧爲乾沒其有仍前不法及攬用掛木諸凡奸弊止

圖了事者各督撫官務要從重參治毋事姑息若
事勢可緩則不妨需徐無益備禦則不妨停止不
必拘泥成案至於驍健馬兵旣免力役之征尤當
時加操練庶幾戰守並脩斯爲完策耳

題爲查錄堵虜力戰官軍以勵人心事案呈到部
看得薊遼總督撫鎮官右都御史楊 等題稱萬
曆五年十二月十七日達賊二千餘騎拆牆進邊
入犯前屯關弁山等處當被各該防守官軍奮勇
力戰拒堵出境城堡保全人畜無失在陣斬首二
顆獲馬一十三匹在官軍陣亡者九十三員名被
傷者二百三十四員名內引近奉

明旨各邊禦虜但以血戰爲功不以損軍爲罪及稱
都司楊紹勲首撓賊鋒設伏邀擊王大璋部有斬

獲把總朱延慶施國臣身被重傷乞要憫其敢戰之苦錄其堵虜之功俱免究或量加賞其誤事備禦張應選守堡官牟景嵩王建忠與有功陣亡人員及地方有無隱匿失事通行巡按御史覈勘明白提問錄恤具奏各一節爲照土蠻速把亥諸酋窺伺全遼已非一日長昂專攤等甘心勾引爲之鄉導分犯遼鎮先擁大衆東掠海州西搶前屯意欲牽制我師以圖狂逞猶幸先事戒嚴分防周密所在官軍拒堵出境進無所獲積忿益深復于十

二月十七日擁衆再犯前屯本謂歲事將終乘虛伺隙乃遊擊王大璋等聞警力敵于前都司楊紹勲等馳援夾擊于後雖其斬獲數少損傷數多得償失功難準罪但該鎮與虜爲隣以戰則歲無休月以守則日無寧時况寇在門庭利用禦戰所據揚紹勲等見敵能奮臨難克前獲功雖少殺虜頗多朱延慶等併力先驅設伏邀擊虜衆遁北不得掠搶行旅城堡俱保無虞似當憫其死力畧其損傷量加優恤俾知感激勉圖後功旣該總督撫

鎮官分別具題前來相應議處併其餘誤事各官情罪及有功陣亡人員錄恤一併通行議擬勘處屬夷長昂專攤等久荷撫賞不思圖報勾引逆虜所宜責諭合候

命下移咨薊遼督撫等官遣令通事嚴責長昂等背負恩信令其改圖如復仍前構犯定行革其撫賞調兵問罪決不輕貸仍移咨都察院轉行彼處巡按御史卽將前項賊經處所從公體勘要將達賊實有若干從何地方進入城堡有何攻破人畜有

無殺虜官軍曾否對敵陣亡殺傷等項是否止於
奏內之數斬獲首級是否真正楊紹勲王大璋等
是否力戰應援應否叙錄其失事有罪張應選等
作何問究陣亡有功莊國麟等作何錄恤逐一查
覈明實一併造冊限本年三月以裏具奏以憑覆
請定奪再照瑞昌等堡去山海關不過一舍之地官
軍對敵合戰聲息傳報難諉不知關內官軍分布
似有信地若使將領聞警提兵關外剗遙爲聲
援不徒力戰孤軍恃以無恐亦足以振威懼虜不

敢深入乃今擁兵觀望閉關不出非所以奮忠勇而保封疆也併候

命下行令內地各將領申諭戒飭以後東路警報務相救應雖不得輕爲舉動亦不可互分彼此以失事機等因萬曆六年二月初九日具題十一日奉聖旨是欽此

題爲地方盜賊殺人乞究怠玩官員以肅法紀以
警將來事案呈到部看得巡視京營吏科等衙門
右給事中等官李 等巡視中兵馬司地方廣東
道試監察御史吳 各題前事爲照兵馬司巡捕
營職專捕盜巡捕營重於夜禁而晝自有按伏尖
哨兵馬重於晝巡而夜亦有巡警更夫職守未嘗
不交相責成也至如巡捕營統於巡視京營科道
兵馬司統於巡城御史遇有失事罪在營捕則巡
視叅之罪在兵馬則巡城叅之罪同則各分叅之

此故事也乃今京城之內白日行劫兵馬捕營罪
本難諉但閉門剽殺踪跡詭秘兵番無從緝訪官
軍從何追捕所擬該司兵馬情有可原巡捕各官
似應免究及照二臣所題一則欲通行懲治以嚴
譴罰一則欲申明職掌以嚴責成無非爾盜安民
之意至於科臣所謂兵番放閑東西空濶欲要增
添舖夫失事小則限捕不叅失事重則分叅專管
臺臣所謂牌甲包替多係無賴欲要會同各城設
法議處務釐宿弊俱爲尊嚴

王畿通論合應依擬恭候

命下將兵馬張府量行戒飭叅將等官劉印等姑各
免究行劫前賊責令戴罪立限嚴行緝捕務在得
獲有能限內緝獲者照例給賞及能獲別盜者遵
照近奉

明旨准贖其

朝房東西添設舖舍增置更夫處給工食及兵番
總甲清革包替巡警軍哨嚴切稽查等項事宜悉
照所議行令各該衙門施行再照火盜之生本難

預知事發之初卽將各官叅論委屬未妥惟盜發而不能擒捕火發而不能撲滅則罪實難逭然盜有明暗時有晝夜詭秘之盜潛踪隱跡惟兵番能緝訪之大夥之盜人衆力强惟官軍能逐捕之發於白晝則責在兵馬番捕發於黑夜則責在巡捕官軍然地居一城事同一體其密相告報互爲應援又當同心協力有不可彼此推諉者合再行申飭城營永爲遵守以後凡遇賊盜生發事小則徑行處治事大則先具題知惟將該管員役責限緝

捕比併事完論其功罪

奏請發落仍各查所由在兵馬聽各城御史叅論
在巡捕聽巡視京營科道叅論其兩相關涉者卽
會同詳叅則大公之體旣立而巡察之職亦舉矣
等因萬曆六年二月初九日具題十一日奉
聖旨依擬行欽此

題爲番賊殘害日滋重臣制禦無策懇乞

聖明速賜議處防禦事宜以安極苦邊圉事案呈到
部看得陝西巡撫董 題稱階文西固一帶斬脩
崖邊遵奉

欽依萬曆五年終完報見今完者僅十之三未完者
尚十之七所據工大人少力役不堪乞要寬論及
稱前工或云脩之便或云脩之不便或云不脩而
移置墩寨於山巔爲便議論紛紛未有定的仍欲
另行勘議停妥奏請一節爲照前項地方逼近番

夷議脩崖工以嚴封守原限萬曆五年終完報今
據已完工程未及一半怠緩之罪本屬難辭但該
撫臣巡歷工所相度形勢質諸羣情議論三端可
否未定則是始事之初已屬輕率從事之後知其
無益明矣若復拘泥成說仍行計議所謂作室道
傍終難底績而民勞財傷無益反害者也所據具
題前因相應酌處上

請伏望

皇上軫念邊軍窮困將原議工程俯爲停止有罪官

員量爲寬宥恭候

命下本部移咨陝西督撫官遵照將前項斬削崖工
悉行停罷惟將沿邊一帶通賊要路酌量大小遠
近或立墩哨瞭或設堡把守或填塞堵截不失設
險防範之意務使功可成而軍不困閑暇之日召
補軍伍置備器械蓄養馬匹積儲糧草使三軍之
力有餘則軍聲可振番賊自懼較之徒竭心力於
版築而無裨於戰守者其勞逸相逕庭矣事完之
日通將停止過緣由并建設過墩堡險要備開具

奏查考施行等因萬曆六年二月初十日具題十

二日奉

聖旨是欽此

題爲恪遵

明旨仰仗

天威飛報主將禦虜非常奇捷事案呈到部看得薊
遼總督撫鎮等官右都御史楊 等恭報大捷一
節爲照胡虜土蠻窺伺全遼要挾侵犯迄無寧歲
自去年五月之後先犯錦州繼犯廣寧歷秋及冬
騷擾兩河月無虛日邇者一出沒于寧前一往來
于錦義一分布于開原復又糾集屬夷一犯于前
屯一犯于海州一犯于瑞昌分道竝進東西牽制

毀我臺牆疲我士馬今又屯集遼河遠中虛稱欲
掠江夷寔將乘我不備忽于今年正月間擁衆而
南結營劈山直逼塞垣勢尤猖獗幸賴

昊天純佑

列聖威靈

皇上

神武布昭

仁德旁溢羣策畢收衆思咸集累降

嚴旨申飭將士協心二力內脩防守外夾戰圖該鎮

文武諸臣乃能各殫忠謀事事有備臨機決策先
發制人出塞摩壘追奔逐北斬獲賊級四百三十
五顆皆其精銳數內曾首五顆又其渠魁所得馬
駝輜重不下數萬及查臨陣軍士帶傷爲數不多
陣亡止于一名別無損折較之往歲搗王杲之巢
斬獲及千原非胡虜近日奏平虜之捷首級二百
尚是情歸未有如出塞遠攻臨陣斬獲如此之多
者也且當

嘉禮告成之辰值捷書

上奏之日

天與人應喜與功偕昔周文肇關雎之化聿成徂莒之功成王當訪落之年遂收淮夷之捷稽之往古獨盛于今誠宜率循

令典宣奏捷音庶以播之四方傳之萬世除獲功人員另行論叙外合候

命下移咨禮部行欽天監擇日具奏及行移鴻臚寺於

皇極門早

朝將差來人員引至

御前宣讀捷音等因萬曆六年二月十三日具題十
五日奉

聖旨朕方行嘉禮該鎮有此大捷實

天地

祖宗默佑朕心深切感仰還着遣官告祭

郊

廟以答洪庥欽此

題爲申明舊例舉劾巡邏官員以安重地事案呈
到部看得南京兵部尚書翁 題稱南京巡邏各
官原議聽提督官每年終甄別勤惰通送該部候
三年閱視分別等第舉劾定爲常例近因歲久廢
弛以致勤惰無別欲要比照京師巡捕事例每年
終聽該部查明舉劾一節爲照

留都重地巡邏貴嚴所有京城巡捕把總等官俱
屬南京兵部照缺選補三年一次閱視舉劾題議
已久向鮮舉行所據南京兵部尚書翁 具題前

因深得振作激勵隆重根本之意但一年之內功
罪未彰論奏頻繁事權不一况三年閱視舉劾先
該題有事例若使着實舉行何患勸懲不立旣稱
停閣日久合行照舊脩舉恭候

命下本部移咨南京兵部行令提督巡捕官督率把
總指揮等官務要用心巡邏緝捕盜賊每遇三年
之期聽該部照例閱視分別等第開列賢否咨部
查考其有賢能卓異者從實奏薦以備錄用怠緩
誤事者指名論劾以憑究治施行等因萬曆六年

二月二十三日具題本月二十五日奉
聖旨是欽此

題爲一年防禦事竣薦揚任久忠勤主將以勵邊
臣事案呈到部照得近該薊遼督撫官右都御史
楊 等題前事內舉劾遼鎮大小將領武職官員
緣由本部覆題節奉

聖旨近來各邊舉薦太頻且卑官小職非有奇材異
能的只宜照常咨部錄用乃一槩列之薦牘多至數
十百人亦爲煩瀆你部裡還酌議來說欽此抄捧送
司案呈到部爲照舉劾之典所以進賢退不肖也
各該總督撫按奉

命鎮巡或年終奏報或防守事完或陞遷交代各遵
例行而沿海江防汛畢又于例外隨事論列雖其
意在搜獎薦賢然諮延既廣僥倖易萌瑣屑隈細
深爲煩瀆

皇上軫念邊疆洞悉事情致厯

嚴旨下令酌議敢不悉心詳具上請

聖裁臣等竊議得舉劾多端賢否則一各率其職以

時舉行政體宜然若或假借機會汎濫市恩以明
揚之大典爲介冑之捷徑非所以重憲綱而昭公

通七合無申飭邊腹督撫巡按并各差御史等官
凡有舉劾之責者或陞任交代或防守事竣或完
報工程或叙錄勞績各隨事體重大者照例舉行
在一時可以無叙者宜從一併舉不得重複煩擾
其宣大三邊互市既有叙錄則秋防之疏惟將叙
錄所不及年深稱職及罪惡顯著者指實陳奏已
經叙錄者不得再陳至于海防春汛果遇海寇侵
犯各官奉調防禦者事畢將有功有罪之人量爲
叙列不得一槩年年舉行然求才雖廣掄才貴精

凡見任自鎮守大將而下以至衛所小職併閒廢
病痊自叅守而上果係智勇超卓功績茂隆操守
清慎武藝絕倫忠實可用者從實叙薦多者不得
過五六十人中者四五十人而止其隨營報效
聽用卑官末職或止效一事之勞或僅有一藝之
長惟加獎賞作養列名咨部以憑紀錄不必一一
奏牘上煩

聖覽其有罪過昭彰賊私狼籍才力闕茸年齒衰邁
者尤當虛心博訪卽事指黜其或事出風聞察無

實跡閭閻掩昧汙蔑中傷者不得瑣瑣濫及上失
聖朝忠厚之體下絕中人自新之路至于免死調發
立功贖罪殺賊等項或立有戰功或效有勞績者
務備開原犯情罪重輕有無在鎮立功者明開年
月充成者分別永遠終身降級者原係何職納級
者有無實職係何等出身奉何明文取送備咨報
部查行若或因循故習依違阿比濫列人數至百
名之上及將附託親暱賈豎私交虛名借職混淆
錯雜希圖開伍復職隳壞法紀滋起奔競辜負

德意者聽科道叅究恭候

命下本部通行各該督撫諸臣及移咨都察院轉行
各該御史遵照

明旨及今議事理着實舉行等因萬曆六年二月二
十四日具題二十六日奉

聖旨舉劾公典必精必覈乃足勸懲今後各督撫巡
按官係陞任交代等項照例舉行其秋防春汛非實
在用兵及事體無甚關係的俱不必瀆奏若有奇才
異能及罪惡顯著者聽不時舉劾不在此限如循習

故套及濫舉市恩着科道指實叅奏其餘依擬欽此

題爲恪遵

明旨仰伏

天威飛報主將禦虜非常奇捷事案呈到部看得薊
遼總督撫鎮官右都御史楊 等具題前因除例
不論功者不議外爲照東虜土蠻乃殘元遺孽有
衆百萬驕悍桀驁尤甚諸酋窺伺全遼要挾貢市
雖經平虜之挫益深報復之謀自去年五月以來
往來侵掠更無虛日十一月間令莽惠等要挾不
遂復令莽忽歹等出沒寧前滾兔灰正等分掠海

卷之三
州十二月間三路屯劄牽制我師今於正月間聚
結大營移駐劈山突逼邊境欲拆牆深入乘我無
備若使堵截稍緩邀擊不前則地方之殘破軍民
之荼毒其害不可勝言者所賴

聖武布昭

廟筭預定該鎮總撫諸臣仰遵

明旨益殫心力總兵官督率將吏先機速發始迎擊
于近邊敵謀已奪繼勦逐于絕塞醜類盡奔計在
陣斬獲首級四百三十五顆內酋首五顆收穫牛

馬駱駝四百九十餘匹盔甲六百七十餘副夷器
弓箭諸物不下萬計賊之渠首多殲精銳殆盡對
敵官軍陣亡一名帶傷二百五十九員名其餘別
無損失自昔威寧搜套斬首四百邇年王杲之誅
俘斬千餘平虜之役首功二百卽已稱奇以今較
之尤爲奇特實惟我

皇上聰明

天縱勇知性成

留神邊務

軫念全遼增餉增兵加賑加賞是以有此且當

嘉禮告成之始

慈御移宮之辰膚功

上奏露布飛傳

綸音下頒

天顏胥喜真足以繩

祖武而慰

慈闈酬百王而垂萬世矣

臣

等伏覩先奉

明旨邊功不許叙及輔臣竊窺

聖意乃謂邊關常事而言至若偉績奇勲一槩抑遏
不爲敷揚

恩命不加酬報無據非所以收宗功而重

國體崇武畧而振士氣也如大學士張 黼黻

王猷運沉機于掌上論功

密勿定石畫于禁中大學士呂 張 貳公弘化仰

彌

一人之猷偶王在亶允作萬邦之憲開誠布公而威
嚴是屬集思廣益而謀斷相資竝宜優叙至如總

督楊 勤宣遠畧克奮忠猷累歲專征乘時備塞
方茲竒捷乃其運籌所當優叙巡撫張 勝美先
得已伐敵人之謀徵發相機遂成戡定之績保固
東土偉烈無雙所當特叙總兵官李 忠勇超羣
謀猷獨擅援桴擐甲備極勞瘁決機賈勇不憚險
危所擬節年功次已及數千見斬虜級又逾四百
雖懋官已叙而世賞未崇似宜大破賞格

錫之封爵以彰殊異其各司道等官或簡練戎兵而
謨謀素定或分布要害而犄角應援將領等官姚

天與等或摧鋒陷陣而敢勇直前或設伏出奇而力謀各殫雖其勞績不同均宜酌量叙錄其各在陣臨敵官軍內除應錄應卹外其他首功無與而摧虜則同似當大賚以昭全凱至於陣亡佟尚仁首攫賊鋒身膏草野良可痛惜其秦得倚等或毀面絕筋而存亡未保或穿鏃觸刃而瘡夷未平俱宜額外加卹俾歿者蒙帷蓋之惠存者沾煦嫗之恩再查帶罪立功各官內如蘇國賦李汝謙吳疆霍九臯俱以失事降級功罪似屬相當但所降祖

級多寡不同合查所獲功次重輕論復柯萬王國
瑞李國相宋承恩皆以失事充軍亦合查實開伍
熊朝臣以舊官委用原無職級僅可仍復舊銜黑
雲龍先任指揮充軍後以功陞副千戶及李尚元
問開伍未經叙功卽回原衛難定職銜以上各官
通候查勘明白照例議擬常春近該論黜亦難復
任仍行該鎮另行加賞及查

令甲所載陣前斬將搥旗擒斬賊首等項奇功原許
卽時奏擬陞賞今據所報揆之前例寔爲允合旣

該督撫等官題

請前來相應出格議擬伏望

皇上俯查舊例將大學士張 呂 張 同加褒蔭

楊 張 優加陞蔭仍行厚賞李 議加封爵仍

行厚賞與楊 張 同

賜爾書褒美以示隆眷賀 等各加陞賞內姚天與

加副總兵職銜黃都加遊擊職銜各照舊管事周

等同加重賞內裁良棟秦得倚各加遊擊職銜

量陞署都指揮僉事熊朝臣堆復原職守備職銜

孫守廉加備禦職銜照例以都指揮體統行事各照舊管事常春仍聽巡撫衙門再加重賞傳廷勲等併賞內李平胡李得全各加備禦職銜照例以都指揮體統行事仍管哨探李興李寧仍各給冠帶王有翼等量賞陣亡修尚仁照依陣亡百戶例奉例行令該衛所將應襲兒男起送赴部准陞三級其書吏高尚學等各吏部免考照例冠帶林世鳳等各准給與冠帶王仲文等行總督衙門量賞照得建非常之功者當與非常之賞三軍鏖戰危

苦備嘗非有

特恩何以示勸查得該鎮王杲平虜之捷俱蒙
聖恩優加賞犒今茲之舉事體相同伏乞

仁慈軫憫大破常格照依前例於太僕寺馬價銀內
量動給發將在陣對敵各官軍酌量給賞陣亡修
尚仁賞銀三十兩帶傷各軍丁分別重輕另給以
爲湯藥之資其餘獲功及斬獲酋首員役併帶罪
立功官蘇國賦等十員名與地方有無別項失事
本部仍咨都察院轉行彼處巡按御史通查明實

分別應陞應賞應贖及被傷者作何優叙一併造冊限本年四月裏具奏前來以憑議覆前項賞功銀兩差本部官一員并奉褒獎

璽書齋赴該鎮會同撫按等官先行宣讀

勅諭獎勞撫鎮仍大集有功文武吏士公同逐一犒賞其給賞過官軍銀兩數目該鎮徑自造冊奏繳庶賞不踰時匪徒該鎮將吏感激懷恩卽九邊士卒亦皆鼓舞思奮矣但

恩典出自

朝廷臣等不敢定擬伏乞

聖裁再照恃勝而驕兵家通弊遭衄思報黠虜常情
今土蠻雖敗而黨類寔繁勢必再逞尤當加意戒
嚴方可善後仍令通行該鎮轉行各司道及各將
領等官務要恪遵

前旨益加督勵練士足餉厲兵秣馬務殫忠勇勉圖
後功毋或驕惰致有他虞等因萬曆六年二月二
十六日具題二十七日奉

聖旨朕方行嘉禮該鎮有此奇功朕心嘉悅李成梁

屢立戰功今又決機出塞斬馘數多論功爲冠着加
太保仍兼太子太保賞銀一百兩大紅紵絲蟒衣一
襲廕一子世襲本衛指揮使楊兆賞銀八十兩紵絲
四表裏廕一子錦衣衛百戶世襲張學顏賞銀八十
兩紵絲四表裏原廕武職伊男陞一級世襲仍各賜
勅獎勵賀溱陞一級姚天與等陞二級還同周世科
等各賞銀二十兩傅廷勲等各十五兩王有翼等各
十兩出邊官軍並戰勞苦除候覈勘照常陞賞外還
發馬價銀二萬兩交兵部司官一員前去會同撫按

官給賞以風勵將士其餘俱依擬本兵調度有功方
逢時賞銀五十兩紵絲四表裏還廕一子入監讀書
給與應得誥命曾省吾邵光先各陞俸一級賞銀三
十兩紵絲二表裏該司郎中陞俸一級賞銀十兩其
餘的各八兩新任總督巡撫梁夢龍賞銀四十兩紵
絲二表裏周詠三十兩二表裏欽此

題爲強盜越獄開擾都城懇乞

聖明查究失事官員以昭法紀以重根本事案呈到
部看得南京兵科給事中等官各題奏東城兵馬
司監原獲打劫宋貳子強盜李憲等打開獄門湧
出隨就擒獲查叅失事官員一節爲照留都重地
刑獄大事聽斷貴專監禁貴慎兵馬司官職在巡
邏捕獲盜賊叅送法司收監問擬京城一應民詞
悉由法司聽斷止是地方喧鬧小事亦必由巡城
御史批詳該司供由報奪兩京一體初無異同所

據兵馬劉檠捕獲劇賊旣該部院題奏自合卽送
法司未盡餘黨應行捕緝乃將各賊犯拘繫日久
防範不嚴致令縱逸害及平民韓鏜等專司典守
刑具解散幾致逋逃職業何在幸賴衆力一時就
擒而怠緩疎虞罪各難諉旣經南京兵科等官各
題稱前來又據該科所論陳堯韋美甘舉等交通
騙害事或有之相應酌議查究恭候

命下將劉檠韓鏜依律免究言輅爾壽并陳堯等一
千人犯行南京法司通提究問發落仍出禁示各

城兵馬司以後詞訟不許私自濫受人犯不許一
槩監禁其該管地方雜事重者叅送法司輕者申
解巡城御史發落敢有仍前故違明禁聽南京兵
刑二部及科道官叅究再照內外守備文武大臣
責任惟均所據羣賊越獄事出倉皇登時擒獲門
官市卒各效其力則其號令素行職業亦舉所據
言官論列緣以根本要地時當戒嚴近事之徵後
事之鑒請乞

天語叮嚀殆亦爲此併候

命下行南京內守備及兵部等衙門各照遵行益加
嚴慎永保無虞等因萬曆六年二月三十日具題
三月初二日奉

聖旨是言幹等都着南京刑部提了問欽此

題爲

國運方泰

帝治惟新懇乞

聖明及時脩舉以裨萬世治安事職方清吏司案呈
到部看得南京貴州道試監察御史陳 奏稱要
將公侯伯除五府掌印僉書不遣外其餘擇其年
二十以上五十以下者量以一半遣之邊方悉隸
大將麾下練習戎事遇有邊警使之將兵一節爲
照

國家用人惟賢是使固未嘗以世類而棄亦不當以世類而私通查開國靖難及累朝續封公侯伯并連外戚恩澤列爵世家未及六十餘姓其有才能堪用者見推管理紅盔將軍兩京五府掌印僉書提督政總督漕運管理操江鎮守雲南湖廣十已居其六七見在新任已經保薦聽用者不過數人候缺推補其餘老幼不堪及曾有過犯被論閑住者止奉朝請食其封祿庶幾保全勲名延慶於後若使徒限年資不擇臧否咨用邊方恐三等

崇階難居倖幕與叅謀議又侵事權非所以全功
臣而辨等威也所據御史陳建白無非以寵祿
世卿義均休戚俾其明習邊事堪備緩急實乃爲
國得人之意况各官叨承世爵俱當曉暢軍務諳
練兵戎邊情將畧委應加意恭候

命下本部行令各爵不拘見任聽用年力精壯者各
要習熟武藝講求韜略其有才望卓越智勇無優
者不拘腹裏邊方大將員缺一體推用等因萬曆
六年三月初十日具題十二日奉

聖旨是欽此

題爲清查庫藏以築城池以肅風紀事案呈到部
看得南京都御史汪 題稱江浦與南京對峙共
守長江之險欲要脩築城池合用工費就將見存
掣鹽等項銀兩經歷司并山東道上元縣江寧縣
各庫通共貯銀一萬八十五兩有零不係起解銀
兩相應動支聽應天巡撫關領應用其不敷之數
及一應脩築事宜俱聽南京兵部應天巡撫從長
計議奏請

定奪及稱掣鹽銀兩盡解南京戶部類解不得仍

奏
卷之三
以解院扣留設法清查盡解濟邊各一節爲照江
浦地方拱衛留都浦口官渡又爲水陸通衢兼之
軍民雜處江防要害關係不輕所據脩築城池委
不容已但沿江板築工費不貲見存庫銀未必足
用况該縣對峙京城雖云隔水堪輿冲勝果否相
應合行勘議停妥可便興作恭候

命下移咨南京兵部分應天巡撫查照所議會同斟
酌要見前項城池應否起築如果當築仍要揣度
文尺計量工費見存庫銀是否足用不敷之數從

何處辨具題前來以憑覆請其掣鹽銀兩盡解南京戶部類解濟邊不得扣留俱如所議等因萬曆六年三月十一日具題十三日奉

聖旨是欽此

題爲議處脩工未用帑銀以備清查事案呈到部
看得遼鎮總督撫鎮官右都御史楊 等具題前

因大率謂寧前脩築臺牆原議空心臺三百座見
脩四年止完臺一十九座石牆一千四百八十七
丈七尺但人力既少工夫難完完亦難守候今歲
見脩永安堡臺牆工完停止并議寧前二處止脩
緊要邊臺一十九座就調該路軍夫二千四百一
十七名每年脩臺六座自萬曆七年爲始計程三
年可完應用脩工錢糧就於該鎮免調夫丁編徵

銀內動支防工兵馬仍在寧前駐防年終將完過
臺工用過錢糧通候閱視其部發脩工銀三萬兩
乞要准作歲發馬價或候緊急題

請動支及要註銷原定大工限期各一節爲照遼
東寧前培臺之脩始自該道具呈閱視督撫會題
議覆該鎮勘報工費浩大須四十餘年而後可完
是其先議已失詳審旣該本部酌議量里先建臺
工兩臺之間止用磚石稍聯爲牆足以拒虜則亦
心知其不可爲而難于中止故小變其說以遷就

其事未有一定之見也又經覆行該鎮估計隨據
總督撫鎮官劉 等題議脩臺三百餘座計費三
萬餘兩本部又議每臺外加雇夫銀一百二十兩
又不過假此以招致軍夫之心冀其功之可成以
終前議之意耳脩築以來迄今三年僅完十一勞
費不貲日久罔效近該巡按御史趙 題議

請止墻工欲要多設臺圉壕塹蓋有見于軍夫之
勞困工程之難就欲爲停止以示休息故 臣等覆
議以爲九邊脩築當各因其地不得一例相拘空

心碑臺固爲無益所當停止而因地設險城堡濠塹亦有當脩非謂一切止之而不爲也今該鎮會勘因見前議臺工浩大難成軍夫勞苦不息以該路見有臺一百二十九座可守惟於險要之處小團山鐵場等處添臺一十九座金復蓋三衛軍夫免行調用惟將本路軍夫二千四百餘名分派脩築工食於免夫編徵銀內動支亦爲可行但于城堡壕塹當脩與否未見明白聲說况寧前一路西接山海東入廣寧北近虜巢南逼海墻官民商賈

往來衝要虜騎易於馳突空臺旣所當止而深溝
高壘以遏奔衝亦不可廢况舊有二濠未否深濶
可限虜騎碑石之牆雖不可戒而沿濠起土爲壘
以爲障蔽又有不可因臺工之止而遂已者臣等
部議所謂脩其所當脩止其所當止急其所當急
緩其所當緩意蓋有在近奉

明旨酌量緩急有必不可已的着悉心措畫允諸臣
之所當仰體竭力者也顧事在彼中難以遙度相
應再行勘處合候

命下本部移咨該鎮督撫諸臣轉行各道及將領等
官查照先今題議事理虛心計處要見該路臺工
停止之外有何城堡未備當脩其見在二濠應否
挑濬沿壕起土築壘以省石墻之費是否可爲逐
一計議務求畫一經久期以早完毋得拘執已見
致有異同亦不得務求簡省有誤設險再照遼海
之地連年苦戰土地拋荒米糧艱貴脩工之軍辛
苦萬狀口糧鹽菜若止令自備尤非人情相應從
厚使人樂從既有丁夫銀兩可動就當量議加給

如有不敷就將所發馬價銀三萬兩留貯該鎮以備不時之費不得別項那移借支以滋靡弊俱限本年四月以裏會奏前來以憑覆

請等因萬曆六年三月十八日具題二十日奉

聖旨是該鎮邊工還着督撫官體勘明白酌議停當具奏欽此

題爲直陳緊切重大機務懇乞

聖明稽

祖制酌時宜博謀獨斷以恢

聖治事案呈到部看得刑部貴州清吏司主事管

所陳杜邊隣之釁大槩有三一謂宣大三鎮馬市

諸會年例之外踰限請乞邊臣扣除軍糧貿易備

馬致離衆心欲要儲財蓄銳以備不虞約束俺會

禁其挾請一謂土蠻數犯遼東未經大創近雖斬

獲數多未忘報復欲要聚糧訓卒以圖搗巢一謂

各邊撫賞脩工銀兩間有剋剝餽遺及稱彌縫無
罰欲要搜刷積弊以求善後各一節爲照權宜之
術不足久持常勝之家難與慮敵卽今北虜款貢
本屬權宜東虜敗遁未嘗忘報所據戰守之圖不
可一日少懈本部先今咨行各鎮練兵足餉厲士
秣馬休養士卒稽查錢糧丁寧申飭頗爲詳盡今
據所奏前因無非思患預防之意相應依擬恭候
命下備行各鎮查照本部節次議處事理通行脩舉
嚴加隄防務圖戰守東路則虞其報復不可恃勝

而生驕惰之心西路則示以限制無徇要求而爲苟安之計至于搗巢一事未可輕率惟足兵固守爲不可勝以待其來則拒之不當貪功倖勝妄動以開邊釁至於宜鎮市馬數多市本不足當議量請增益以省扣軍之累其邊餉銀兩敢有剋剝餽送彌縫者聽各撫按指名叅究伏候

聖裁等因萬曆六年三月二十二日具題二十四日奉

聖旨是欽此

題爲遵成議罷輓臺請明

允發脩臺馬價銀兩以便遵守事案呈到部看得延
綏巡撫宋 題稱今歲脩築空心磚臺悉行停止
先有

請發工料除戶部銀兩原係本鎮客餉正項仍聽
管糧郎中照舊收候作正支銷其兵部原議馬價
銀一萬二千四百五十兩免行給發及稱各城堡
邊牆墩臺應脩緊要工程另行看實脩理一節爲
照設險之事有三城堡爲最牆垣次之墩臺又次

之應脩應止較然甚明但今各邊急於自效一槩
並興徒使軍士勞苦功成無用所謂務脩守之名
而無保障之實者也昨該科臣有言凡遇不急之
工無裨戰守者一切停罷故本部覆議通行九邊
備查見今工程惟爲其所當爲止其所當止急其
所當急緩其所當緩非爲一切盡已也今延鎮撫
臣議將空心磚臺停止息軍省費深爲有見其原
給工料馬價委應退還但查彼中地方城堡邊牆
之類或有未完做工軍士口糧鹽菜尤當有備所

據前項銀兩已經給發日久計期已抵該鎮不徒
該鎮待用儘可通融抑且往來跋涉尤非事體既
該巡撫官具題前來相應酌議合候

命下移咨延綏巡撫一面將前給馬價銀一萬二千
四百五十兩收貯在庫一面遵照先今所議事理
備查所屬地方城堡之未備邊牆之復頽緊要工
程當及時興舉不可一槩停止者應支工價口糧
鹽菜並聽動支前銀應用不得別項支銷等因萬
曆六年三月二十五日具題二十七日奉

聖旨是欽此

題爲查革冒濫關文以蘇疲衛事案呈到部看得
南京兵部尚書翁 等題稱軍衛衝疲乞要禁約
衛所不得應付公差內外官員軍牢軍夫吹鼓手
雖有真正大差不得擅起衛關若管軍官指稱應
付科歛者叅奏重處一節爲照軍衛之設非同驛
遞金鼓響器以備軍容各該軍下專備差操城守
大小軍官牢伴額設俱有定數無有額外軍夫軍
牢之名也况近年以來逃亡日多清勾數少本等
職事猶恐不敷至於應付送迎旣已難繼兼之橫

奏草 卷之三 四
索乾折其何以堪節該言官建議本部覆奉

明旨禁革開載至詳申飭非一乃今積習相沿牢不可破是在各該所司着實舉行耳今該尚書翁等具題前來合再申飭恭候

命下通行南京兵部各該撫按嚴加禁約所屬凡遇公差內外官員除係軍情重大于例該用響器吹鼓手者照舊應付外其餘遵照先今題奉

明旨通行禁革不得擅起衛關其軍牢軍夫盡行裁革不許編僉應付如管軍官指稱應付及故違需

索者卽便指名叅奏等因萬曆六年三月二十六
日具題二十八日奉

聖旨是欽此

題爲披竭愚忠籌議邊務懇乞

聖明採納以圖安攘事案呈到部看得刑科給事中
王 條陳五事均於邊務有裨合就開立前件議
擬上

請伏乞

聖裁等因謹題請

旨

計開

一用近邊之武臣

云

云

前件臣等看得本欵所陳要將總副叅遊等官於本鎮見任將領陞擢守提把總等官於臨近衛所指揮千百戶推選如大將員缺本鎮乏人方於附近擇用一節爲照南北之風土本殊人才之習尚亦異因地用人因人授任古今通義也本部邇來推用大小各將領稽其才識之優劣計其年資之淺深量其地方之遠近酌量器使行之已久所據科臣具題前因與本部見行大畧相同合應依擬着實舉行然人難求備事貴

達權自叅遊而下於本地用之或可無缺自副
叅而上責任旣重人數亦少又有難以執於一
方者况通才巨器不爲風氣所拘習俗所移者
又當惟其所用以需成功似不可狃于故常者
也伏候

聖裁

二汰邊臣之冒濫

云

云

前件

臣

等看得本款所陳謂奔競之徒投充哨把

名色旋即陞擢以致侵剋軍需消索士氣爭功

奏
卷三
掩罪多由此輩一節爲照用人之道惟才是取
不以其類古今名將紹承箕裘者固多而奮起
行伍者亦自有之况使功使過去詐去貪難以
槩論第邇年以來習俗旣競士行益偷加之以
納級名色雜之以請託干謁轉相倣效實繁有
徒坐名咨用冒濫滋廣節奉

明旨通查去後所據科臣具題前因深切時弊相應
依擬合移咨各邊督撫備查各屬武職嚴加考
覈果係操行端慎存心忠直知謀出衆勇藝超

倫者照舊留用其有武藝生疎才力短弱詭譎
諂媚之徒或係賈豎私人進不以正白丁假役
投托買求詭名報效倚勢生事剝軍害人冒功
廢餉者悉行革退其大小將領有貪殘不法者
撫按官從重叅究拏問伏候

聖裁

三慎賞罰之大典

云

前件臣等看得本欵所陳謂賞罰分明由於瑯罪
失實遇警則卒旅當鋒將領殿後虜去則功歸

將領罪加旗軍甚有割民首充功者欲要嚴查
一節無非慎重賞罰以昭勸懲之意相應擬
合無備行各該總督撫按官遇勘功罪無論將
領軍卒一體從公總覈從實開報務使賞必當
功罰必當罪如有買功奪功并妄割貪功者悉
照所議依律例治罪伏候

聖裁

四恤邊方之百姓

云云

前件臣等看得本款所陳謂邊民困於財力苦於

擄掠欲行撫按官優恤嚴禁有司擾害免額外
之賦罷不急之工并將招派貧軍止其永戍負
累殷商加意蘇息賑恤被虜家口譴斥殘民官
員及板升叛人要行招撫各一節卷查萬曆五
年該臣先任總督條陳招納一欸事機人情亦
已詳悉本部覆議明示

恩信如例安插題奉

欽依通行欽遵訖爲照邊方疲民困苦萬狀委宜優
卹今據科臣所議甚得撫綏招徠之意相應依

擬合無備行各邊撫按衙門轉行有司將各屬
邊民加意撫綏去無藝之征停無益之役稽戶
丁之永戍寬殷商之累害并存恤賑貸等事悉
如所議至於招撫叛人查照題

准事理施行伏候

聖裁

五鼓士卒之銳氣

云

云

前件臣等看得本款所陳謂邊軍勞於工作困於
侵漁衣糧散給又多後時要行各邊督撫巡按

嚴飭將領等官撫恤軍士時給月糧痛釐侵剋
節其力役時其訓練一節無非休養士卒振揚
威武之意相應依擬合無備行各邊總督撫按
衙門嚴行各該兵備大小將領等官將各邊軍
士加意撫恤時其頒給杜其侵剋仍要均其逸
勞嚴加簡稽俾其服習戰陳俱如前議施行伏
候

聖裁等因萬曆六年三月二十八日具題三十日奉
聖旨是欽此

題爲懇乞

聖明及時脩舉切要急務以隆萬世治安事案呈到
部內除添設官員脩葺號舍及議更權豚係隸別
部掌行咨各具履外其一謂南京根本重地武事
廢弛要行內外守備叅贊大臣時督將領申明紀
律嚴加汰選革去羸弱收補精壯務實營伍一節
爲照

兩都竝建重大惟均所據南京西接荆襄控扼江
淮之險南引甌越兼制湖海之衝

官

殿

陵寢庶府百司重城萬雉內而中官外而世臣以爲之保障重而叅贊浸而營衛以爲之筦鑰樞機詳密法守森嚴可謂備矣邇年以來軍政廢弛武備不脩憊弱衰殘僅充行伍誠有如御史陳 所言者所據具題前因無非尊嚴

王畿拱固根本之意相應依擬恭候

命下移文南京內外守備叅贊大臣時督將領申明

紀律嚴加簡稽責成服習營伍之中將見操正軍食糧餘下汰革老弱選補精壯其餘雜差城守等役各從其便仍要禁約軍職不得過爲搜求以滋紛擾務使留後重地不至空虛至於

京城禁近巡邏貴嚴乃有屠戶人等糾黨逾越漸不可長併行各該管轄衙門申明夜禁嚴加訪拿從重究治再照理善烹鮮更化有漸留都軍民依附

輦轂習於宴安漸成驕惰整齊振刷委不可已所

貴節制大臣留心整頓時加撫循深根固本無逾
於此等因萬曆六年三月二十九日具題四月初
一日奉

聖旨是欽此

題爲酌定籌邊經制以預安攘事案呈到部看得
總督宣大侍郎吳 具題前因條議五事俱於戰
守撫有裨 合就開立前件議擬上
請定奪等因謹題請

旨

計開

一酌戰守之制

云云

前件

臣

等看得本款所陳戰守事宜及練兵量
犒并將戰具查議脩補聽各巡撫於積貯銀

內或徑自動支或具數奏

請年終造冊報部及聽巡按并閱視查驗一節爲照
禦虜之策惟戰與守戰守之具在器與兵機
宜不審分合無方則無以應敵犒給不敷器
械不整則無以勸士今據所議無非安攘之
計合無備行宣大山西督撫衙門行令大小
將領等官如遇虜警將前項一應戰守隨宜
舉行其優犒戰士脩補器具合用銀兩俱於
見貯庫銀支用多則具數題發少則徑自動

支年終造冊送部仍聽巡按閱視查驗等項
悉如所議施行伏候

聖裁

一酌設險之制

云云

前件臣等看得本款謂欲將山大軍夾暫於四
六八月各休半月以脩農事斷自萬曆七年
爲始各照宣府事例一體更番續議工程加
意包脩大同邊工一竣卽併力脩民堡山西
見議工程止以邊軍聽役其腹裏節年戍邊

民壯暫聽存留派脩各府州縣未完城堡各鎮應給脩工口糧鹽菜依期支放嚴禁侵扣歇工月分止於冬初春後晴和之日量行採辦工料其採料日期全給口糧鹽菜一節爲照設險守國自古爲然築垣脩堞所以據地利也憫勞恤苦所以得人和也今據所議無非逸道使民之意合無備行宣大山西督撫衙門行令所屬文武將吏將前項邊腹工程及時脩舉放班以便耕作更番以示休息口

糧鹽菜依期支放嚴禁侵扣採辦工料之類
准令全給等項悉如所議施行至於三鎮應
脩土程尤當行委各道兵備等官親行勘閱
凡係有益保障必不可已者以次興脩其先
年空心磚臺及用磚包邊牆之說易人廢財
無益實用者一切停罷不得依違有誤邊計
伏候

聖裁

一酌賞罰之制云

前件

臣

等看得本款一謂大小將領分任戰守

不許推諉一謂大舉虜情凡官軍臨陣當先
殺賊數多者不必責取首級惟割左耳備驗
果有頭功奇功照例叙錄割耳數少不得以
頭功奇功論叙一謂領兵官當先陣斬數多
照頭功奇功例一體超陞世襲一謂紀功官
查報失真勘覈遲久議要隨營紀驗覆查得
實願賞者聽卽支散積貯銀兩借給一半將
願陞官軍分別首從同賞過人數用過銀兩

造冊奏報以憑陞叙及速行查發賞功銀兩
一謂臨陣退怯者合申明律令各將所部許
照軍法斬一二人以徇又謂遇有大戰宜錄
其功少寬其罪各一節查得萬曆三年十二
月該總督薊遼侍郎楊 題爲大虜入犯等
事本部覆議節奉

聖旨以後各邊將士遇虜但以力戰爲功不以損軍
爲罪欽此通行欽遵訖今據前議無非致詳
功罪大彰激勸之意合無備行宣大山西督

撫衙門行令所屬大小將吏等官除已前功
次仍照舊例論叙外自今以後遇有大敵官
軍果能奮勇當先殺賊有頭功奇功者不必
責取首級惟割左耳覈實照例陞賞若領兵
官果能身先士卒破敵摧鋒卽查清下斬首
數多者許照頭功奇功事例一體超陞世襲
勘覈功罪務要依限完報無得仍前稽遲有
逾時日至於責成將領及隨營驗功申明臨
陣條例量寬損折之罪等項悉如所議施行

再照首級驗功著在

令甲各邊零斬賊寇非此無據惟是遇有大敵臨陣倉皇割爭首級多致僨事所議割耳爲記但可偶一爲之不得定以爲例至於軍前覈功尤當備細查驗方准奏報中間竊報冒濫者紀功官一體叅奏治罪伏候

聖裁

一酌貢夷之制

云云

前件臣等看得本款謂今年貢夷各執稱子女

頭領生長効勞者以漸加增比例乞討陞賞
要行通融酌處除管事乞陞頭領及管事乞
賞散夷應給賞者不請給於

內帑卽於三鎮撫賞銀內量行處給內拔其緊要
數人同虜王各枝子孫每歲總計未得過三
十人照舊具題請陞其應得賞資仍於

內府一體頒給著爲定例一節爲照虜欲無厭漸
固難長因時制馭亦當有權查得萬曆四年
九月具題陞賞貢夷本部覆議節奉

聖旨今次姑從所請照數陞賞以後省諭虜王務遵
原約毋得歲歲求增欽此已經通行欽遵似
難更議加益但據各夷求討堅力勢難固絕
况賞費不多陞亦虛器委當通融議處合無
備行宣大山西督撫衙門將每年貢夷乞陞
頭領乞賞散夷應給賞者照議於三鎮撫賞
銀內量行處給如有病故者明諭虜王令其
開除不得虛冒其每歲照舊請陞頒賞三十
人數亦如所議奏行仍令通事員役曉諭各

虜務要遵奉約束無復分外請乞以滋月濫
伏候

聖裁

一酌撫馭之制

云

前件臣等看得本款謂邊夷鼠竊輕則量爲罰
治重則聲罪會長等許將領隱忍彌縫倘虜
渝盟如禍機尚隱則具奏定議如事機已急
則發兵勦截或虜復乞哀不妨更撫其用間
設竒悉聽便宜從事一節爲照虜雖款貢而

狗偷鼠竊時或有之相機撫禦勢不容已今
據所議無非先事預防之意合無備行宣大
山西督撫衙門行令所屬大小將領今後每
遇各夷有緣邊竊盜查無別逞者卽呈請督
撫衙門或輕或重隨宜處治不得容隱以損
威重亦不許貪功以啓釁端倘各虜曾敢於
負恩背信無故生事者卽宜閉關絕貢一面
具奏一面截勦如悔過乞哀復行撫處至于
用間設竒有裨軍機者存乎其人難以預議

內有應行奏請者具奏

定奪伏候

聖裁等因萬曆六年正月初二日具題初四日奉

聖旨首級驗功着照舊貢夷陞賞歲增非宜今年且
着臨期奏來定奪其餘依議行朝廷委任邊臣戰守
機宜原不中制如果專心圖國經理有方功績自不
可掩不然雖目事題覆亦竟何益今後惟事情重
有關係不敢自由的許具實陳奏自外職
他每依實幹理不必崇飾彌文欽此